

故宮博物院藏

四庫全書
撤出本
彙編

第二十六冊

故宮博物院編
故宮出版社

故宮博物院藏

四庫

全書

撤出本

彙編

第二十六冊

故宮博物院編

故宮出版社

第二十六册 目錄

南北史合注卷一百八十四—卷一百八十九 一

卷一百八十四 三

卷一百八十五 八九

卷一百八十六 一三三

卷一百八十七 二〇一

卷一百八十八 二九九

卷一百八十九 三七一

欽定四庫全書

史部

南北史合注卷一百一十四

欽定四庫全書

南北史合注卷一百八十四

明李清撰

北史九十八


百濟

勿吉

契丹

豆莫婁

室韋



列傳第八十六

高麗

新羅

奚



地豆干

烏洛侯

流求

倭

題四夷高麗等國

蓋天地所覆載至大日月所照臨至廣萬物內生靈寡
而禽獸多兩儀間中土局而殊俗曠人寓形天地稟氣
陰陽愚智本於自然剛柔繫於水土故霜露所會風氣
所通九川為紀五嶽作鎮此謂諸夏生其地者則仁義
所出昧谷嵎夷孤竹北戶限以丹徼紫塞隔以滄海交

河此謂荒裔感其氣者則凶德所稟若九夷八狄種落
繁熾七戎八蠻充牣邊鄙雖風土殊俗嗜欲不同至於
貪而無厭狼而好亂強而旅拒弱而稽首其揆一也秦
皇鞭撻天下黷武遐方漢武士馬強壯肆志遠畧匈奴
已却其國乃虛天馬既來其人亦困是知鴈海龍堆天
所以紀夷狄也炎方朔漠天所以限南北也況乎時非
秦漢志甚羸劉逆天道以求功殫人力而從欲顛墜之
釁固不旋踵是以先王設教內諸夏而外夷狄往哲垂

範美樹德而鄙廣地雖禹迹東漸西被不過海及流沙
王制自北徂南裁猶穴交趾豈非道貫三古義高百代
者乎自魏至隋市朝屢革其四夷朝享亦各因時今各
編次備四夷傳云

高句麗其先出夫餘王嘗得河伯女因閉室內為日所
照引身避之曰影又逐既有孕生一卵大如五升夫餘
王棄之與犬犬不食與豕豕不食棄於路牛馬避之棄
於野衆鳥以毛茹之王剖不能破遂還其母母以物裹

置暖處有一男破而出及長字曰朱蒙俗言朱蒙者善射也夫餘人以朱蒙非人所生請除之王不聽命養馬朱蒙始試知有善惡駿者減食令瘦駕者善養令肥夫餘王以肥者自乘以瘦者給朱蒙後狩于田以朱蒙善射給之一矢朱蒙雖一矢殪獸甚多夫餘人又謀殺之其母告朱蒙朱蒙乃與烏引烏達等二人東南走中道遇大水欲濟無梁夫餘人追之甚急朱蒙告水曰我是日子河伯外孫今追兵垂及如何得濟於是魚鼈成橋

朱蒙得渡魚鼈乃解追騎不渡朱蒙遂至普述水遇見
三人一著麻衣一著衲衣一著水藻衣與朱蒙至紇升
骨城遂居焉號高句麗因以高為氏其在夫餘妻懷孕
朱蒙逃後生子始閭諳及長知朱蒙為國王即與母亡
歸之名曰閭達委之國事朱蒙卒子如栗立如栗卒子
莫來立乃并夫餘

史糾曰諸國本末事與魏齊周隋相切者方應紀錄
否者削之諸傳正體宜云某國出某氏後已詳某書

其傳中文多不載一二語可了無煩刺刺愚謂諸國
初起大畧亦不可盡芟今節而存之

莫來子孫相傳至裔孫宮宮生而目開能視國人惡之
及長凶虐國以殘破及曾孫位宮亦生而視人高麗呼
相似為位以為似其曾祖宮故名位宮亦有勇力便鞍
馬善射獵曹魏正始三年位宮寇遼西為幽州刺史母
邱儉所敗玄孫乙弗利利子釗與慕容氏相攻擊尋敗
後為百濟所殺太武時釗曾孫璉始遣使詣安東奉表

貢方物并請國諱太武嘉其誠款詔下帝系名諱於其國使員外散騎侍郎李敖拜璉為都督遼海諸軍事征東將軍領東夷中郎將遼東郡公高句麗王敖至其所居平壤城訪其方事云去遼東一千餘里東東至柵城南至小海北至舊夫餘民戶三倍於曹魏時後貢使相尋歲致黃金二百斤白銀四百斤時燕王馮弘率衆奔之太武遣散騎常侍封撥詔璉送弘璉上書稱當與弘俱奉正化竟不遣太武怒將往討之樂平王邳等議待

後舉乃止而弘亦尋為璉所殺後文明太后以獻文六
宮未備敕璉令薦其女璉奉表云女已出求以弟女應
旨許之乃遣安樂王真尚書李敷等至境送幣璉感其
左右之說謂朝廷昔與馮氏婚姻未幾滅其國殷鑒不
遠宜以方便辭璉遂上書妄稱女死朝廷疑其矯拒又
遣假散騎常侍程駿切責之若女審死更聽選宗淑璉
云若天子恕其前愆謹奉詔會獻文崩乃止孝文時璉
貢獻倍前報賜亦稍加時光州於海中得璉所遣齊使

餘奴等送闕孝文詔責曰蕭道成親殺其君竊號江左
朕方欲興滅國于舊邦繼絕世於劉氏而卿越境外交
遠通篡賊豈藩臣守節之義今不以一過掩舊款即送
還藩其感恕思愆祇承明憲輯寧所部動靜以聞太和
十五年薨卒年百餘歲孝文舉哀東郊

資治通鑑曰帝為制素委貌布深衣

遣謁者僕射李晏上策贈車騎大將軍太傅遼東郡公
高句麗王謚曰康又遣大鴻臚拜璉孫雲使持節都督

遼海諸軍事征東將軍領護東夷中郎將遼東郡公高
句麗王賜衣冠服物車旗之飾又詔雲遣世子入朝觀
郊邱禮雲上書辭疾遣其從叔升于隨使詣闕嚴責之
自此歲常貢獻正始中宣武于東堂引見其使芮悉弗
悉弗奏曰高麗繫誠天極地產土毛無愆王貢但黃金
出夫餘珂則涉羅所產今夫餘為勿吉所逐涉羅為百
濟所并國王臣雲惟繼絕之義悉遷國內二器所以不
登王府實兩賊之為宣武曰高麗世荷上將專制海外

九夷黠鹵實得征之方貢之愆責在連率宜宣朕旨於卿主務盡威懷之畧使二邑還復舊墟土毛無失常貢神龜中雲卒靈太后為舉哀東堂遣使策贈車騎大將軍領護東夷校尉遼東郡公高麗王又拜其世子安為鎮東將軍領東夷校尉遼東郡公高麗王正光初年光州又於海中執得梁所授安寧將軍衣冠劔珮及使人江法盛等送京師安卒子延立孝武初詔加延使持節散騎常侍車騎大將軍領護東夷校尉遼東郡公高句